CBETA電子佛典集成

CBETA Chinese Electronic Tripitaka Collection eBook

T48n2007

唐 法海集

財團佛教電子佛典基金會

目次

- 編輯說明
- 章節目次
 - 。第一折
 - 。第二折
 - 。<u>第三折</u>
 - 。第四折
 - 第五折
 - 。 第六折
 - 。第七折
 - 第八折
 - 。 第九折
 - 。 第十折
 - 。第十一折
 - 。第十一折
 - 。第十三折
 - 。第十四折
 - 。第十五折
 - 。 第十六折
 - 。第十七折
 - 。 第十八折
 - 。 第十九折
 - 。<u>第二十折</u>
 - 。 第二十一折
 - 。 第二十二折
 - 。第二十三折
 - 第二十四折
 - 。 第二十五折
 - 。 第二十六折
 - 。第二十七折
 - 。第二十八折
 - 。 第二十九折
 - 第一十折
 - 。第三十一折
 - 。第三十二折

- 。第三十三折
- 。第三十四折
- 。第三十五折
- 。第三十六折
- 。第三十七折
- 。第三十八折
- 。第三十九折
- 。第四十折
- 。第四十一折
- 。第四十二折
- 。第四十三折
- 。第四十四折
- 。 第四十五折
- 。第四十六折
- 。第四十七折
- 。第四十八折
- 。第四十九折
- 。第五十折
- 。第五十一折
- 。第五十二折
- 。第五十三折
- 。第五十四折
- 。 第五十五折
- 。第五十六折
- 。第五十七折
- 卷目次
 - o 1.
- 贊助資訊

編輯說明

- 本電子書以「CBETA 電子佛典集成 Version 2023.Q4」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta..org 回報。
- <u>版權所有</u>,歡迎自由流通,但禁止營利使用。

No. 2007

南宗頓教最上大乘摩訶般若波羅蜜經六祖惠能大師於韶州大梵寺施 法壇經一卷

兼授無相戒弘法弟子法海集記

惠能大師於大梵寺講堂中,昇高座,說摩訶般若波羅蜜法,授無相 戒。其時座下僧尼、道俗一萬餘人,韶州刺史章據及諸官僚三十餘 人,儒士三十餘人,同請大師說摩訶般若波羅蜜法。刺史遂令門人 僧法海集記,流行後代,與學道者承此宗旨,遞相傳授,有所依 約,以為稟承,說此《增經》。

能大師言:「善知識!淨心念摩訶般若波羅蜜法。」大師不語,自 淨心神,良久乃言:「善知識<mark>靜</mark>聽:惠能慈父,本官范陽,左降遷 流<mark>嶺</mark>南,作新州百姓。惠能幼小,父亦早亡。老母孤遺,移來<mark>南</mark> 海。艱辛貧乏,於市賣柴。忽有一客買柴,遂領惠能至於官店,客 將柴去。惠能得錢,却向門前,忽見一客讀《金剛經》。惠能一 聞,心明便悟。乃問客曰:『從何處來,持此經典?』客答曰:

『我於蘄州黃梅<mark>縣</mark>東<mark>馮茂</mark>山,禮拜五祖弘忍和尚,<mark>現今</mark>在彼,門人 有千餘眾。我於彼聽見大師勸道俗,但持《金剛經》一卷,即得見 性,直了成佛。』惠能聞說,宿業有緣,便即辭親,往黃梅<mark>馮茂</mark>山 禮拜五祖弘忍和尚。」

弘忍和尚問惠能曰:「汝何方人?來此山禮拜吾,汝今向吾邊,復求何物?」惠能答曰:「弟子是嶺南人,新州百姓,今故遠來禮拜和尚,不求餘物,唯求作佛。」大師遂責惠能曰:「汝是嶺南人,又是獵獠,若為堪作佛!」惠能答曰:「人即有南北,佛性即無南北;獵獠身與和尚不同,佛性有何差別?」大師欲更共語,見左右在旁邊,大師便不言,遂發遣惠能令隨眾作務。時有一行者,遂差惠能於碓坊踏碓八个餘月。

五祖忽於一日喚門人盡來,門人集<mark>訖</mark>。五祖曰:「吾向汝說,世人 生死事大。汝等門人,終日供養,只求福田,不求出離生死苦海。 汝等自性迷,福門何可救汝?汝<mark>等</mark>且歸房自看,有知惠者,自取本 性般若知之,各作一偈呈吾。吾看汝偈,若悟大意者,付汝衣法, 稟為六代。火急作!」

門人得處分,却來各至自房,遞相謂言:「我等不須澄心用意作偈,將呈和尚。神秀上座是教授師,秀上座得法後,自可依止,偈不用作!」諸人息心,盡不敢呈偈。時大師堂前有三間房廊,於此廊下供養,欲畫楞伽變,並畫五祖大師傳授衣法流行後代為記。畫人盧珍看壁了,明日下手。

上座神秀思惟:「諸人不呈心偈,緣我為教授師,我若不呈心偈, 五祖如何得見我心中見解深淺?我將心偈上五祖呈意,求法即善, 覓祖不善,却同凡心奪其聖位。若不呈心偈,終不得法。」良久思 惟,甚難甚難!夜至三更,不令人見,遂向南廊下中間壁上題作呈 心偈,欲求衣法。「若五祖見偈,言此偈語,若訪覓我,我見和 尚,即云是秀作。五祖見偈言不堪,自是我迷,宿業障重,不合得 法,聖意難測,我心自息。」秀上座三更於南廊下中間壁上秉燭題 作偈,人盡不知。偈曰:

「身是菩提樹, 心如明鏡臺, 時時勤<mark>拂</mark>拭, 莫使有塵埃。」

神秀上座題此偈畢,卻歸房臥,並無人見。五祖平旦,遂<mark>喚</mark>盧供奉來南廊下,畫楞伽變。五祖忽見此偈,<mark>讀訖</mark>,乃謂供奉曰:「弘忍與供奉錢三十千,深勞遠來,不畫變相也。《金剛經》云:『凡所有相,皆是虛妄。』不如留此偈,令迷人誦。依此修行,不墮三惡;依法修行,人有大利益。」大師遂喚門人盡來,焚香偈前,眾人入見已,皆生敬心。弘忍曰:「汝等盡誦此偈者,方得見性,依此修行,即不墮落。」門人盡誦,皆生敬心,喚言善哉!五祖遂唤秀上座於堂內,問:「是汝作偈否?若是汝作,應得我法。」秀上座於堂內,問:「是汝作偈否?若是汝作,應得我法。」秀上座言:「罪過!實是神秀作。不敢求祖,願和尚慈悲,看弟子有小智惠識大意否?」五祖曰:「汝作此偈,見解只到門前,尚未得可得。<mark>要</mark>入得門,見自本性。汝且去,一兩日思惟,更作一偈來呈吾,若入得門,見自本性,當付汝衣法。」秀上座去數日,作不得。

有一童子,於碓坊邊過,唱誦此偈。惠能一聞,知未見<mark>性</mark>,即識大意。能問童子:「適來誦者,是何言偈?」童子答能曰:「你不知大師言生死事大,欲傳衣法,令門人等各作一偈來呈看,悟大意,即付衣法,稟為六代祖。有一上座名神秀,忽於南廊下書無相偈一首,五祖令諸門人盡誦,悟此偈者,即見自性;依此修行,即得出離。」惠能答曰:「我此踏碓八個餘月,未至堂前,望上人引惠能至南廊下,見此偈禮拜,亦願誦取,結來生緣,願生佛地。」童子引能至南廊下,能即禮拜此偈。為不識字,請一人讀。惠能聞已,即識大意。惠能亦作一偈,又請得一解書人,於西間壁上提着,呈自本心,不識本心,學法無益,識心見性,即悟大意。惠能偈曰:

「菩提本無樹, 明鏡亦無臺,

佛性常清淨, 何處有塵埃?」

又偈曰:

「心是菩提樹, 身為明鏡臺, 明鏡本清淨, 何處染塵埃?」

院內徒眾,見能作此偈,盡怪,惠能却入確坊。五祖忽來廊下,見惠能<mark>偈</mark>,即知識大意。恐眾人知,五祖乃謂眾人曰:「此亦未得了。」

五祖夜至三更,喚惠能堂內,說《金剛經》。惠能一聞,言下便悟。其夜受法,人盡不知,便傳頓教法及衣,以為六代祖。衣將為信稟,代代相傳;法以心傳心,當令自悟。五祖言:「惠能!自古傳法,氣如懸絲!若住此間,有人害汝,汝即須速去。」能得衣法,三更發去。五祖自送能至九江驛,登時便別,五祖處分:「汝去,努力將法向南,三年勿弘此法,難去在後弘化,善誘迷人,若得心開,與吾悟無別。」辭違已了,便發向南。兩月中間,至大庾嶺,不知向後有數百人來,欲擬捉惠能,奪衣法,來至半路,盡總却迴。唯有一僧,姓陳名惠順,先是三品將軍,性行麁惡,直至嶺上,來趁把着。惠能即還法衣,又不肯取。惠順曰:「我故遠來求法,不要其衣。」能於嶺上,便傳法惠順,惠順得聞,言下心開,能使惠順即却向北化人。惠順得聞,言下心開,能使惠順即却向北化人。

思能來於此地,與諸官僚迫俗,亦有累劫之因。教是先聖所傳,不是惠能自知。願聞先聖教者,各須淨心,聞了願自除迷,如先代悟(下是法)。惠能大師喚言:「善知識!菩提般若之智,世人本自有之,即緣心迷,不能自悟,須求大善知識示道見性。善知識!愚人智人,佛性本亦無差別,只緣迷悟,迷即為愚,悟即成智。

「善知識!我此法門,以定惠為本。第一勿迷,言惠定別,定惠體 一不二。即定是惠體,即惠是定用。即惠之時定在惠,即定之時惠 在定。善知識!此義即是定惠等。學道之人作意,莫言先定發惠, 先惠發定,定惠各別。作此見者,法有二相,口說善,心不善,惠 定不等;心口俱善,內外一種,定惠即等。自悟修行,不在口諍。 若諍先後,即是迷人。不斷勝負,却生法我,不離四相。」

「一行三昧者,於一切時中,行、住、坐、臥,常<mark>行直</mark>心是。《淨名經》云:『直心是道場,直心是淨土。』莫心行諂曲,口說法直,口說一行三昧,不行直心,非佛弟子。但行直心,於一切法上,無有執著,名一行三昧。迷人著法相,執一行三昧,直言坐不動,除妄不起心,即是一行三昧。若如是,此法同無情,却是障道

因緣。道<mark>須</mark>通流,何以却滯?心<mark>不住法,道</mark>即通流,住即被縛。若坐不動是,維摩詰不合呵舍利弗宴坐林中。善知識!又見有人教人坐,看心看淨,不動不起,從此置功。迷人不悟,便執成顛,即有數百般如此教道者,故知大錯。

「善知識!定惠猶如何等?如燈光,有燈即有光,無燈即無光。燈 是光之體,光是燈之用。名即有二,體無兩般。此定惠法,亦復如 是。

「善知識!法無頓漸,人有利鈍。<mark>迷</mark>即漸勸,悟人頓修。識自本心,是見本性,悟即原無差別,不悟即長劫輪迴。

「善知識!我此法門,從上以來,頓漸皆立無念為宗,無相為體,無住為本。何名無相?無相者,於相而離相。無念者,於念而不念。無住者,為人本性,念念不住,前念、今念、後念,念念相續,無有斷絕。若一念斷絕,法身即離色身。念念時中,於一切法上無住。一念若住,念念即住,名繫縛。於一切法上,念念不住,即無縛也,是以無住為本。善知識!外離一切相,是無相。但能離相,性體清淨。是以無相為體,於一切境上不染,名為無念。於明處受生。學道者用心,莫不識法意。自錯尚可,更勸他人继,不自見迷,又謗經法。是以立無念為宗。即緣述人於境上有念,念上便起邪見,一切塵勞妄念從此而生。然此教門立無念為宗,世人離見,不起於念,若無有念,無念亦不立。無者無何事?念者念何物?無者,離二相諸塵勞;念者,念真如本性。真如是念之體,念是真如之用。自性起念,雖即見聞覺知,不染萬境,而常自在。《維摩經》云:『外能善分別諸法相,內於第一義而不動。』

「善知識!此法門中,坐禪原不著心,亦不著淨,亦不言不動。若言看心,心原是妄,妄如幻故,無所看也。若言看淨,人性本淨,為妄念故,蓋覆真如。離妄念,本性淨。不見自性本淨,起心看淨,却生淨妄,妄無處所。故知看者,看却是妄也。淨無形相,却立淨相,言是功夫,作此見者,障自本性,却被淨縛。若修不動者,不見一切人過患,即是自性不動。迷人自身不動,開口即說人是非,與道違背。看心看淨,却是障道因緣。

「今既如是,此法門中,何名坐禪?此法門中,一切無礙,外於一切境界上念不起為坐,見本性不亂為禪。何名為禪定?外離相曰禪,內不亂曰定。外若離相,內性不亂。本性自淨曰定,只緣境觸,觸即亂,離相不亂即定。外離相即禪,內不亂即定,外禪內定,故名禪定。《維摩經》云:『即時豁然,還得本心。』《梵網菩薩戒經》云:『本源自性清淨。』善知識!見自性自淨,自修自作自性法身,自行佛行,自作自成佛道。

「善知識!總須自體與受無相戒。一時,逐惠能口道,令善知識見 自三身佛:於自色身,歸依清淨法身佛;於自色身,歸依千百億化 身佛;於自色身,歸依當來圓滿報身佛。(已上三唱)色身是舍宅,不 可言歸,向者三身在自法性,世人盡有,為迷不見,外覓三身如 來,不見自色身中三身佛。善知識!聽與善知識說,令善知識於自 色身見自法性有三身佛,此三身佛從自性上生。何名清淨法身佛? 善知識!世人性本自淨,萬法在自性。思量一切惡事,即行於惡 行;思量一切善事,便修於善行。知如是一切法盡在自<mark>性</mark>,自<mark>性</mark>常 清淨,日月常<mark>明。只為雲覆蓋,上明</mark>下暗,不能了見日月**星**辰,忽 遇惠風吹散<mark>捲</mark>盡雲霧,萬<mark>象森</mark>羅,一時皆現。世人性淨,猶如清 天。惠如日,智如月,智惠常明。於外著境,妄念浮雲蓋覆,自性 不能明故。遇善知識,開真正法,吹却迷妄,內外明澈,於自性 中,萬法皆現。一切法在自性。名為清淨法身。自歸依者,除不善 心與不善行,是名歸依。何名為千百億化身佛?不思量,性即空 寂;思量,即是自化。思量惡法,化為地獄;思量善法,化為天 堂;思量毒害,化為畜生;思量慈悲,化為菩薩。思量智惠,化為 上界;<mark>思量</mark>愚癡,化為下方。自<mark>性變化甚多</mark>,迷人自不知見。一念 善,知惠即生,此名自性化身佛。何名為圓滿報身佛?一燈能除千 年闇,一智能滅萬年愚。莫思向前,常思於後,常後念善,名為報 身。一念惡,報却千年善心;一念善,報却千年惡滅。無常以來, 後念善,名為報身。從法身思量,即是化身;念念善,即是報身。 自悟自修,即名歸依也。皮肉是色身,<mark>色身</mark>是舍宅,不在歸依也。 但悟三身,即識大意。

「今既自歸依三身佛已,與善知識發四弘大願。善知識!一時逐惠能道:眾生無邊誓願度,煩惱無邊誓願斷,法門無邊誓願學,無上佛道誓願成(三唱)。善知識!眾生無邊誓願度,不是惠能度,善知識心中眾生,各於自身自性自度。何名自性自度?自色身中,邪見煩惱,愚癡迷妄,自有本覺性,將正見度。既悟正見般若之智,除却愚癡迷妄。眾生各各自度,邪來正度,迷來悟度,愚來智度,惡來善度,煩惱來菩提度,如是度者,是名真度。煩惱無邊誓願斷,自心除虛妄。法門無邊誓願學,學無上正法。無上佛道誓願成,常下心行,恭敬一切,遠離迷執,覺智生般若,除却迷妄,即自悟佛道成,行誓願力。

「今既發四弘誓願訖,與善知識<mark>授</mark>無相懺悔,<mark>滅</mark>三世罪障。大師言:善知識!前念、後念及今念,<mark>念念</mark>不被愚迷染。從前惡行一時除,自性若除即是懺;前念後念及今念,念念不被愚痴染,除却從前矯誑心,永斷名為自性懺。前念、後念及今念,念念不被疽疾染,除却從前嫉妒心,自性若除即是懺(已上三唱)。善知識!何名懺

悔?<mark>懺</mark>者終身不作,悔者知於前非。惡業<mark>恆</mark>不離心,諸佛前口說無益,我此法門中,永斷不作,名為懺悔。

「今既懺悔已,與善知識授無相三歸依戒。」大師言:「善知識!歸依覺,兩足尊;歸依正,離欲尊;歸依淨,眾中尊。從今以後,稱佛為師,更不歸依餘邪迷外道,願自三寶慈悲證明。善知識!惠能勸善知識歸依三寶。佛者,覺也;法者,正也;僧者,淨也。自心歸依覺,邪迷不生,少欲知足,離財離色,名兩足尊。自心歸依正,念念無邪故,即無愛著,以無愛著,名離欲尊。自心歸依淨,一切塵勞妄念,雖在自性,自性不染著,名眾中尊。凡夫不解,從日至日,受三歸依戒。若言歸佛,佛在何處?若不見佛,即無所歸;既無所歸,言却是妄。善知識!各自觀察,莫錯用意,經中只言自歸依佛,不言歸依他佛。自性不歸,無所依處。

「今既自歸依三寶,總各各至心,與善知識說摩訶般若波羅蜜法。 善知識雖念不解,惠能與說,各各聽。摩訶般若波羅蜜者,西國梵語,唐言大智惠彼岸到。此法須行,不在口念。口念不行,如幻如化。修行者,法身與佛等也。何名摩訶?摩訶者是大。心量廣大,猶如虛空。若空心坐禪,即落無記空。虛空能含日月星辰大地山河,一切草木,惡人善人,惡法善法,天堂地獄,盡在空中,世人性空,亦復如是。

「性含萬法是大,萬法盡是自<mark>性</mark>。見一切人及非人,惡<mark>之</mark>與善,惡 法善法,盡皆不捨,不可染著,猶如虚空,名之為大,此是摩訶 行。迷人口念,智者心行。又有迷人,空心不思,名之為大,此亦 不是。心量廣大,不行是小。莫口空說,不修此行,非我弟子。 「何名般若?般若是智惠。一切時中,念念不愚,常行智惠,即名 般若行。一念愚即般若絕,一念智即般若生。世人心中常愚,自言 我修般若。般若無形相,智惠性即是。何名波羅蜜?此是西國梵 音,唐言彼岸到。解義離生滅,著境生滅起。如水有波浪,即是於 此岸;離境無生滅,如水永長流,故即名到彼岸,故名波羅蜜。迷 人口念,智者心行。當念時有妄,有妄即非真有;念念若行,是名 真有。悟此法者,悟般若法,修般若行。不修即凡,一念修行,法 身等佛。善知識!即煩惱是菩提。前念迷即凡,後念悟即佛。善知 識!摩訶般若波羅蜜,最尊、最上、第一,無住、無去、無來。三 世諸佛從中出,將大智惠到彼岸,打破五陰煩惱塵勞,最尊、最 上、第一。讚最上乘法,修行定成佛。無去、無住、無來往,是定 惠等,不染一切法,三世諸佛從中變三毒為戒定惠。

「善知識!我此法門從一般若生八萬四千智惠。何以故?為世人有八萬四千塵勞,若無塵勞,般若常在,不離自性。悟此法者,即是

無念、無<mark>憶</mark>、無著。莫<mark>起誑</mark>妄,即自是真如性。用智惠觀照,於一切法不取不捨,即見性成佛道。

「善知識!若欲入甚深法界,入般若三昧者,直須修般若波羅蜜行,但持《金剛般若波羅蜜經》一卷,即得見性,入般若三昧。當知此人功德無量,經中分明讚嘆,不能具說。此是最上乘法,為大智上根人說。小根之人若聞法,心不生信。何以故?譬如大龍,若下大雨,雨於閻浮提,城邑聚落,悉皆漂流,如漂草葉;若下大雨,雨於大海,不增不減。若大乘者,聞說《金剛經》,心開悟解。故知本性自有般若之智,自用智惠觀照,不假文字。譬如其雨水,不從天有,原是龍王於江海中,將身引此水,令一切眾生,一切草木,一切有情無情,悉皆蒙潤。諸水眾流,却入大海,海納眾水,合為一體。眾生本性般若之智,亦復如是。

「小根之人,聞說此頓教,猶如大地草木根性自小者,若被大雨一 沃,悉皆自倒,不能增長。小根之人,亦復如是。有般若之智,與 大智之人亦無差別。因何聞法即不悟?緣邪見障重,煩惱根深,猶 如大雲,蓋覆於日,不得風吹,日無能現。般若之智,亦無大小, 為一切眾生,自有迷心,外修覓佛,未悟自性,即是小根人。聞其 頓教,不信外修,但於自心,令自本性常起正見,一切邪見煩惱, 塵勞眾生,當時盡悟,猶如大海,納於眾流,小水大水,合為一 體,即是見性。內外不住,來去自由,能除執心,通達無礙,心修 此行,即與《般若波羅蜜經》本無差別。

「一切經書及文字,小大二乘,十二部經,皆因人置,因智惠性故,故然能建立。我若無世人,一切萬法本亦不有。故知萬法本從人興,一切經書因人說有。緣在人中有愚有智,愚為小人,智為大人。迷人問於智者,智人與愚人說法,令使愚者悟解心開。迷人若悟解心開,與大智人無別。故知不悟,即佛是眾生;一念若悟,即眾生是佛。故知一切萬法,盡在自身心中,何不從於自心頓見真如本性。《梵網菩薩戒經》云:『本源自性清淨。』識心見性,自成佛道。《維摩經》云:『即時豁然,還得本心。』

「善知識!我於忍和尚處,一聞言下大悟,頓見真如本性。是故以 頓悟教法流行後代,令學道者頓悟菩提,各自觀心,令自本性頓 悟。若不能自悟者,須覓大善知識示道見性。何名大善知識?解最 上乘法,直示正路,是大善知識,是大因緣。所為示道,令得見 性。一切善法,皆因大善知識能發起故。三世諸佛十二部經,在人 性中本自具有。不能自性悟,須得善知識示道見性。若自悟者,不 假外求善知識。若取外求善知識望得解脫,無有是處。識自心內善 知識,即得解脫。若自心邪迷,妄念顛倒,外善知識即有教授,救 不可得。汝若不得自悟,當起般若觀照,剎那間妄念俱滅,即是自 真正善知識,一悟即至佛地。自性心地,以智惠觀照,內外明澈, 識自本心。若識本心,即是解脫。既得解脫,即是般若三昧。悟般 若三昧,即是無念。何名無念?無念法者,見一切法,不著一切 法;遍一切處,不著一切處。常淨自性,使六賊從六門走出,於六 塵中不離不染,來去自由,即是般若三昧,自在解脫,名無念行。 莫百物不思,當令念絕,即是法縛,即名邊見。悟無念法者,萬法 盡通;悟無念法者,見諸佛境界;悟無念頓法者,至佛位地。

「善知識!後代得吾法者,常見吾法身不離汝左右。善知識!將此頓教法門,同見同行,發願受持,如是佛教,終身受持而不退者,欲入聖位,然須傳授,從上以來,默然而付衣法,發大誓願,不退菩提,即須分付。若不同見解,無有志願,在在處處,勿妄宣傳,損彼前人,究竟無益。若愚人不解,謗此法門,百劫千生,斷佛種性。」

大師言:「善知識!聽<mark>吾</mark>說〈無相頌〉,令汝<mark>迷</mark>者罪滅,亦名〈滅 罪頌〉」。頌曰:

「愚人修福不修道, 謂言修福而是道。 布施供養福無邊, 心中三業原來在。 若將修福欲滅罪, 後世得福罪原在。 若解向心除罪缘, 各自性中直懺悔。 若悟大乘真懺悔, 除邪行正即無罪。 學道之人能自觀, 即與悟人同一例。 惠能 今 傳 此 頓 教 , 願學之人同一體。 若欲當來覓法身, 三毒惡緣心裏洗。 忽然虚度一世休。 努力修道莫悠悠, 若遇大乘頓教法, 虔誠合堂至心求。」

大師說法了,韋使君、官僚、僧眾、道俗,讚言無盡,昔所未聞。使君禮拜,白言:「和尚說法,實不思議。弟子尚有少疑,欲問和尚。望意和尚大慈大悲,為弟子說。」大師言:「有疑即問,何須再三?」使君問:「法可不?是西國第一師達摩祖師宗旨?」大師言:「是!」使君問:「弟子見說達摩大師化梁武帝。帝問達摩:『朕一生以來,造寺、布施、供養有功德否?』達摩答言:『並無功德。』武帝惆悵,遂遣達摩出境。未審此言,請和尚說。」六祖言:「實無功德,使君勿疑達摩大師言。武帝著邪道,不識正言:「實無功德,使君勿疑達摩大師言。武帝著邪道,不識正法。」使君問:「何以無功德?」和尚言:「造寺、布施、供養,只是修福。不可將福以為功德,功德在法身,非在於福田。自法性有功德,平直是佛性,外行恭敬,若輕一切人,再我不斷,即自無

功德。自性無功德,法身無功德。念念行平等直心,德即不輕。常行於敬,自修身即功,自修心即德。功德自心作,福與功德別。武帝不識正理,非祖大師有過。」

使君禮拜,又問:「弟子見僧俗常念阿彌陀佛,願往生西方。請和 尚說,得生彼否?望為破疑。」大師言:「使君聽,惠能與說。世 尊在舍衛城,說西方引化,經文分明,去此不遠,只為下根。說近 說遠,只緣上智。人自兩種,法無兩般。迷悟有殊,見有遲疾。迷 人念佛生彼,悟者自淨其心。所以佛言:『隨其心淨,則佛土 淨。』使君!東方但淨心無罪,西方心不淨有愆。迷人願生東方、 西方,悟者所在處並皆一種。心地但無不淨,西方去此不遠;心起 不淨之心,念佛往生難到。除一惡即行十萬;無八邪即過八千。但 行直心,到如彈指。使君!但行十善,何須更願往生?不斷十惡之 心,何佛即來迎請?若悟無生頓法,見西方只在剎那;不悟頓教大 乘,念佛往生路遠,如何得達?」六祖言:「惠能與使君移西方剎 那間,目前便見,使君願見否?」使君禮拜:「若此得見,何須往 生?願和尚慈悲,為現西方,大善!」大師言:「一時見西方!無 疑即散!」大眾愕然,莫知何事。大師曰:「大眾!大眾!作意 聽!世人自色身是城,眼、耳、鼻、舌、身即是城門。外有五門, 內有意門。心即是地,性即是王。性在王在,性去王無。性在身心 存,性去身心壞。佛是自性作,莫向身外求。自性迷,佛即是眾 生;自性悟,眾生即是佛。慈悲即是觀音,喜捨名為勢至,能淨是 釋迦,平直即是彌勒,人我即是須彌,邪心即是海水,煩惱即是波 浪,毒心即是惡龍,塵勞即是魚鼈,虛妄即是鬼神,三毒即是地 獄,愚癡即是畜生,十善<mark>即</mark>是天堂。無人我,須彌自倒;除邪心, 海水竭;煩惱無,波浪滅;毒害除,魚龍絕。自心地上覺性如來, 放大智惠光明,照曜六門清淨,照破六欲諸天,下照三毒若除,地 獄一時消滅,內外明<mark>澈</mark>,不異西方。不作此修,如何到彼?」座下 聞說,讚聲徹天,應是迷人,了然便見。使君禮拜,讚言:「善 哉!善哉!普願法界眾生,聞者一時悟解。」 大師言:「善知識!若欲修行,在家亦得,不由在寺。在寺不修, 如西方心惡之人;在家若修行,如東方人修善。但願自家修清淨,

如西方心惡之人;在家若修行,如東方人修善。但願自家修清淨,即是<mark>西</mark>方。」使君問:「和<mark>尚</mark>!在家如何修?願為指授。」大師言:「善知識!惠能與道俗作〈無相頌〉,汝等盡誦取,依此修行<mark>頓教法</mark>,常與惠能說一處無別。」頌曰:

一說通及心通, 如日<mark>處</mark>虛空, 惟傳頓教法, 出世破邪宗。 教即無頓漸, 迷悟有遲疾,

若學頓教法, 愚人不可悉。 說即雖萬般, 合理還歸一, 常須生惠日。 煩惱暗字中, 邪來因煩惱, 正來煩惱除, 邪正悉不用, 清淨至無餘。 菩提本清淨, 起心即是妄, 淨性於妄中, 但正除三障。 世間若修道, 一切盡不妨, 常見在己過, 與道即相當。 色類自有道, 離道別覓道, 覓道不見道, 到頭還自懷。 若欲覓直道, 行正即是道, 自若無正心, 暗行不見道。 若真修道人, 不見世間過, 若見世間非, 自非却是左。 他非我不罪, 我非自有罪, 但自去非心, 打破煩惱碎。 若欲化愚人, 事須有方便, 勿令彼有疑, 即是菩提現。 法原在世間, 於世出世間, 勿離世間上, 外求出世間。 邪見在世間, 正見出世間, 邪正悉打却, 菩提性宛然。 此但是頓教, 迷來經累劫, 亦名為大乘, 悟即剎那間。」

大師言:「善知識!汝等盡誦取此偈,依偈修行,去惠能千里,常在能邊;依此不修,對面千里。各各自修,法不相待。眾人且散,惠能歸漕溪山,眾生若有大疑,來彼山間,為汝破疑,同見佛性。」合座官僚道俗,禮拜和尚,無不嗟嘆:「善哉大悟,昔所未聞,嶺南有福,生佛在此,誰能得知?」一時盡散。大師往漕溪山,韶、廣二州行化四十餘年。若論門人,僧之與俗,約有三五千人,說不可盡。若論宗旨,傳授壇經,以此為依約。若不得《壇經》,即無稟受。須知法處、年、月、日、姓名,遞相付囑。無《壇經》稟承,非南宗弟子也。未得稟承者,雖說頓教法,未知根本,終不免諍。但得法者,只勸修行,諍是勝負之心,與佛道違背。

世人盡傳南宗能、北宗秀,未知根本事由,且秀禪師於南都荊州江 陵府當陽縣玉泉寺住持修行,惠能大師於韶州城東三十五里漕溪山 住持修行。法即一宗,人有南北,因此便立南北。何以漸頓?法即 一種,見有遲疾,見遲即漸,見疾即頓,法無漸頓,人有利鈍,故 名漸頓。

神秀師常見人說,惠能法疾,直<mark>指見</mark>路。秀師遂<mark>喚</mark>門人僧志誠曰:「汝聰明多智,汝與吾至漕溪山到惠能所,禮拜但聽,莫言吾使汝來。所聽<mark>得</mark>意旨,記取,却來與吾說,看惠能見解與吾誰疾遲。汝第一早來,勿令吾怪。」志誠奉使,歡喜遂行,半月中間,即至漕溪山,見惠能和尚,禮拜即聽,不言來處。志誠聞法,言下便悟,即契本心。起立即禮拜,白言:「和尚!弟子從玉泉寺來,秀師處不得啟悟,聞和尚說,便契本心。和尚慈悲,願當教示。」惠能大師曰:「汝從彼來,應是細作?」志誠曰:「不是!」六祖曰:「何以不是?」志誠曰:「未說時即是,說了即不是。」六祖言:「煩惱即是菩提,亦復如是!」

大師謂志誠曰:「吾聞汝禪師教人,唯傳戒定惠,汝和尚教人戒定惠如何?當為吾說!」志誠曰:「秀和尚言戒定惠:諸惡不作名為戒,諸善奉行名為惠,自淨其意名為定,此即名為戒定惠。彼作如是說,不知和尚所見如何?」惠能和尚答曰:「此說不可思議,惠能所見又別。」志誠問:「何以別?」惠能答曰:「見有遲疾。」志誠請和尚說所見戒定惠。大師言:「汝聽吾說,看吾所見處:心地無非是自性戒,心地無亂是自性定,心地無癡是自性惠。」大師言:「汝師戒定惠勸小根智人;吾戒定惠勸上智人。得悟自性,亦不立戒定惠。」志誠言:「請大師說,不立如何?」大師言:「自性無非、無亂、無癡,念念般若觀照,常離法相,有何可立?自性頓修,無有漸次,所以不立。」志誠禮拜,便不離漕溪山,即為門人,不離大師左右。

又有一僧名法達,常誦《法華經》七年,心迷不知正法之處。來至 漕溪山禮拜,問大師言:「弟子常誦《妙法蓮華經》七年,心迷不知正法之處,經上有疑,大師智惠廣大,願為除疑?」大師言: 「法達!法即甚達,汝心不達!經上無疑,汝心自邪,而求正法, 吾心正定即是持經。吾一生以來,不識文字,汝將《法華經》來, 對吾讀一遍,吾聞即知。」法達取經到,對大師讀一遍,六祖聞 已,即識佛意,便與法達說《法華經》。六祖言:「法達!《法華經》無多語,七卷盡是譬喻因緣。如來廣說三乘,只為世人根鈍。 經文分明,無有餘乘,唯有一佛乘。」大師言:「法達!汝聽一佛 乘,莫求二佛乘,迷即却汝性。經中何處是一佛乘?吾與汝說,經 云:『諸佛世尊唯以一大事因緣故,出現於世。』(已上十六字是正法)

此法如何解?此法如何修?汝聽吾說,人心不思,本源空寂,離却 邪見即一大事因緣。內外不迷,即離兩邊。外迷著相,內迷著空, 於相離相,於空離空,即是不迷。若悟此法,一念心開,出現於 世。心開何物?開佛知見。『佛』猶如『覺』也,分為四門:開覺 知見,示覺知見,悟覺知見,入覺知見。此名開、示、悟、入,從 一處入,即覺知見,見自本性,即得出世。」大師言:「法達!吾 常願一切世人,心地常自開佛知見,莫開眾生知見。世人心邪,愚 迷造惡,自開眾生知見;世人心正,起智惠觀照,自開佛<mark>知</mark>見。莫 開眾生知見,開佛知見即出世。」大師言:「法達!此是《法<mark>華</mark> 經》一乘法。向下分三,為<mark>迷</mark>人故。汝但<mark>依</mark>一佛乘。」大師言: 「法達!心行轉《法華》,不行《法華》轉;心正轉《法華》,心 邪《法華》轉。開佛知見轉《法華》,開眾生知見被《法華》 轉。」大師言:「努力依法修行,即是轉經。」法達一聞,言下大 悟,涕淚悲泣,白言:「和尚!實未<mark>曾</mark>轉《法華》,七年被《法 華》轉;以後轉《法華》,念念修行佛行。」大師言:「即佛行是 佛。」其時聽人,無不悟者。 時有一僧名智常,來漕溪山,禮拜和尚,<mark>問</mark>四乘法義。智常問和尚 曰:「佛說三乘,又言最上乘,弟子不解,望為教示。」惠能大師 曰:「汝自身心見,莫著外法相,原無四乘法。人心量四等,法有 四乘。見聞讀誦是小乘,悟法解義是中乘,依法修行是大乘。萬法 盡通,萬行俱備,一切不離,但離法相,作無所得,是最上乘,最 上乘是最上行義,不在口諍,汝須自修,莫問吾也。」 又有一僧名神會,襄陽人也。至漕溪山禮拜,問言:「和尚坐禪, 見亦不見?」大師起,把打神會三下,却問神會:「吾打汝,痛不 痛?」神會答言:「亦痛亦不痛。」六祖言曰:「吾亦見亦不 見。」神會又問:「大師何以亦見亦不見?」大師言:「吾亦見, 常見自過患,故云亦見。亦不見者,不見他人過罪,所以亦見亦不 見也。汝亦痛亦不痛如何?」神會答曰:「若不痛,即同無情木 石;若痛,即同凡夫,即起於恨。」大師言:「神會!向前!見不 見是兩邊,痛不痛是生滅。汝自性且不見,敢來弄人?」神會禮 拜,<mark>再</mark>禮拜,更不言。大師言:「汝心迷不見,問善知識覓路;<mark>汝</mark> 心悟自見,依法修行。汝自迷不見自心,却來問惠能見否?吾不自 知,代汝迷不得;汝若自見,代得吾迷?何不自修,問吾見否?」 神會作禮,便為門人,不離漕溪山中,常在左右。 大師遂喚門人法海、志誠、法達、智常、智通、志徹、志道、法 珍、法如、神會。大師言:「汝等十弟子近前,汝等不同餘人,吾 滅度後,汝等各為一方師。吾教汝等說法,不失本宗。舉三科法 門,動用三十六對,出沒即離兩邊,說一切法,莫離於性相。若有

人問法,出語盡雙,皆取法對,來去相因,究竟二法盡除,更無去處。三科法門者,蔭、界、入。蔭,是五蔭;界,是十八界;入,是十二入。何名五蔭?色蔭、受蔭、想蔭、行蔭、識蔭是。何名十八界?六塵、六門、六識。何名十二入?外六塵,中六門。何名六塵?色、聲、香、味、觸、法是。何名六門?眼、耳、鼻、舌、身、意是。法性起六識:眼識、耳識、鼻識、舌識、身識、意識、六門、六塵。自性含萬法,名為含藏識。思量即轉識,生六識,出六門、六塵,是三六十八。由自性邪,起十八邪;若自性正起十八正。惡用即眾生,善用即佛。用由何等?由自性。

「對。外境無情對有五:天與地對,日與月對,暗與明對,陰與陽對,水與火對。語言法相對,有十二對:有為無為對,有色無色對、有相無相對、有漏無漏對、色與空對、動與靜對、清與濁對、凡與聖對、僧與俗對、老與少對、長與短對、高與下對。自性起用對有十九對:邪與正對、癡與惠對、煩惱與菩提對、慈與害對、直與曲對、實與虛對、始與平對、煩惱與菩提對、慈與害對、喜與噴對、捨與慳對、進與退對、生與滅對、常與無常對、為自性起用對有十九對,都合成三十六對,外境無情對有五對,自性起用對有十九對,都合成三十六對也。此三十六對法,解用通一切經,出入即離兩邊。如何自性起用三十六對共人言語?出外,於相離相;入內,於空離空。著空,則惟長無明;著相,則惟長邪見。秉法直言,不用文字。既云不用文字?人不合言語,言語即是文字。自性上說空,正語言本性不空。迷自惑,語言除故。暗不自暗,以明故暗;暗不自暗,以明變暗。以暗現明,來去相因,三十六對,亦復如是。」

大師言:「十弟子!以後傳法,遞相教授一卷《壇經》,不失本宗。不稟受《壇經》,非我宗旨。如今得了,遞代流行。得遇《壇經》者,如見吾親授。十僧得教授已,寫為《壇經》,遞代流行,得者必當見性。」

大師先天二年八月三日滅度。七月八日,喚門人告別。大師先天元年於新州國恩寺造塔,至先天二年七月告別。大師言:「汝眾近前,吾至八月,欲離世間,汝等有疑早問,為汝破疑,當令逃者盡悟,使汝安樂。吾若去後,無人教汝。」法海等眾僧聞已,涕淚悲泣。唯有神會不動,亦不悲泣。六祖言:「神會小僧,却得善不善等,毀譽不動。餘者不得,數年山中,更修何道?汝今悲泣,更憂阿誰?憂吾不知去處在?若不知去處,終不別汝。汝等悲泣,即不知吾去處;若知去處,即不悲泣。性體無生無滅,無去無來。」「汝等盡來,吾與汝一偈:〈真假動靜偈〉,汝等盡誦取,具此偈

「汝等盡<mark>坐</mark>,吾與汝一偈:〈真假動<mark>靜</mark>偈〉,汝等盡誦取,見此偈

意,<mark>與吾意</mark>同。依此修行,不失宗旨。」僧眾禮拜,請大師留偈, 敬心受持。偈曰:

「一切無有真, 不以見於真。 若見於真者, 是見盡非真。 若能自有真, 離假即心真。 自心不離假, 無直何處直? 有情即解動, 無情即無動。 同無情不動。 若修不動行, 若見直不動, 動上有不動, 無情無佛種。 不動是不動, 能善分別相, 第一義不動。 若悟作此見, 則是真如用。 報諸學道者, 努力須用意。 莫於大乘門, 却執牛死智。 前頭人相應, 即共論佛義。 若實不相應, 合掌禮勸善。 此教本無諍, 若諍失道意。 執迷諍法門, 自性入牛死。」

眾僧既聞,識大師意,更不敢諍,依法修行。一時禮拜,即知大師不久住世。上座法海向前言:「大師!大師去後,衣法當付何人?」大師言:「法即付了,汝不須問。吾滅後二十餘年,邪法撩亂,惑我宗旨。有人出來,不惜身命,定佛教是非,竪立宗旨,即是吾正法。衣不合傳,汝不信,吾與誦先代〈五祖傳衣付法頌〉。若據第一祖達摩頌意,即不合傳衣。聽吾與汝誦。」頌曰:「第一祖達摩和尚頌曰:

「吾本來東土, 傳教救<mark>迷情</mark>, 一花開五葉, 結菓自然成。

「第二祖惠可和尚頌曰:

「本來緣有地, 從地種花生, 當本元無地, 花從何處生?

「第三相僧璨和尚頌曰:

「花種類因地, 地上種花生, 花種無生性, 於地亦無生。

「第四祖道信和尚頌曰:

「花種有生性, 因地種花生, 先緣不和合, 一切盡無生。

「第五祖弘忍和尚頌曰:

「有情來下種, 無情花即生, 無情又無種, 心地亦無生。

「第六祖惠能和尚頌曰:

「心地含情種, 法雨即花生, 自<mark>悟</mark>花情種, 菩提菓自成。」

能大師言:「汝等聽吾作二頌,取達摩和尚頌意。汝迷人依此頌修 行,必當見性。」第一頌曰:

「心地邪花放, 五葉逐根隨, 共造無明業, 見被業風吹。」

第二頌曰:

「心地正花放, 五葉逐<mark>根</mark>隨, 共修般若惠, 當來佛菩提。」

六祖說偈已了,放眾僧散。門人出外思惟,即知大師不久住世。 六祖後至八月三日食後,大師言:「汝等著位坐,吾今共汝等 別!」法海問言:「此頓教法傳授,從上以來至今幾代?」六祖 言:「初,傳授七佛,釋迦牟尼佛第七,大迦葉第八,阿難第九, 末田地第十,商那和修第十一,優婆毱多第十二,提多迦第十三, 佛陀難提第十四,佛陀蜜多第十五,脇比丘第十六,富那奢第十 七,馬鳴第十八,毘羅長者第十九,龍樹第二十,迦那提婆第二十 一,羅睺羅第二十二,僧迦那提第二十三,僧迦耶舍第二十四,鳩 摩羅馱第二十五,闍耶多第二十六,婆修盤多第二十七,摩拏羅第 二十八,鶴勒那第二十九,師子比丘第三十,舍那婆斯第三十一,優婆堀第三十二,僧迦羅第三十三,須婆蜜多第三十四,南天竺國王子第三子菩提達摩第三十五,唐國僧惠可第三十六,僧璨第三十七,道信第三十八,弘忍第三十九,惠能自身當今受法第四十。」大師言:「今日以後,遞相傳授,須有依約,莫失宗旨。」法海又白:「大師今去,留付何法,令後代人如何見佛?」六祖言:「汝聽!後代迷人,但識眾生,即能見佛;若不識眾生,覓佛萬劫不可得見也。吾今教汝識眾生見佛,更留〈見真佛解脫頌〉,迷即不見佛,悟者即見。」法海願聞,代代流傳,世世不絕。六祖言:「汝聽!吾與汝說。後代世人,若欲覓佛,但識眾生,即能識佛,即緣佛心有眾生,離眾生無佛心。

「迷即佛眾生, 悟即眾生佛。 愚癡佛眾生, 智惠眾生佛。 心<mark>嶮</mark>佛眾生, 平等眾生佛。 一生心若<mark>嶮</mark>, 佛在眾生中。 一念悟若平, 即眾生自佛。 我心自有佛, 自佛是真佛。 自若無佛心, 向何處求佛?」

大師言:「汝等門人好住!吾留一頌,名〈自性見真佛解脫頌〉。後代迷人,聞此頌意,即見自心自性真佛。與汝此頌,吾共汝別。」頌曰:

「直如淨性是直佛, 邪見三毒是直魔。 邪見之人魔在舍, 正見之人佛在堂。 性中邪見三畫生, 即是魔王來住舍。 正見忽除三畫心, 魔變成佛直無假。 三身原本是一身。 化身報身及法身, 若向性中覓自見, 即是成佛菩提因。 本從化身生淨性, 淨性常在化身中。 性使化身行正道, 當來圓滿直無窮。 好性本是淨性因, 除好即無淨性身。 性中但自離 五欲, 見性剎那即是真。 今生若悟頓教門, 悟即眼前見世尊。 若欲修行 求覓佛, 不知何處欲覓真? 若能心中自有直, 有真即是成佛因。 白不求直外覓佛, 去覓總是大癡人。

頓教法者是西流, 救度世人須自修。 今報世間學道者, 不依此見大悠悠。」

大師說偈已了,遂告門人曰:「汝等好住,今共汝別,吾去以後, 莫作世情悲泣,而受人<mark>弔問</mark>錢帛,著孝衣,即非聖法,非我弟子。 如吾在日一種,一時端坐,但無動無<mark>靜</mark>,無生無滅,無去無來,無 是無非,無住,<mark>坦</mark>然寂<mark>靜</mark>,即是大道。吾去以後,但依法修行,共 吾在日一種;吾若在世,汝違教法,吾住無益。」大師云此語已, 夜至三更,奄然遷化。大師春秋七十有六。

大師滅度之日,寺內異香<mark>氛</mark>氳,經數日不散。山<mark>崩</mark>地動,林木變白,日月無光,風雲失色。八月三日滅度,至十一月迎和尚神座於漕溪山,葬在龍龕之內,白光出現,直上衝天,三日始散。韶州刺史韋據立碑,至今供養。

此《壇經》,法海上座集。上座無常,付同學道<mark>際</mark>。道<mark>際</mark>無常,付門人悟真。悟真在嶺南<mark>漕溪</mark>山法興寺,現今傳<mark>授</mark>此法。

如付此法,須<mark>得上根智,深</mark>信佛法,立<mark>於</mark>大悲,持此經,以為<mark>稟</mark> 承,於今不絕。

和尚本是韶州曲江縣人也。如來入涅槃,法教流東土,共傳無住心,即我心無住。此真菩薩說,真實亦譬喻,唯教大智人,無住是旨依。凡發誓修行,修行遭難不退,遇苦能忍,福德深厚,方授此法。如根性不堪,裁量不得,雖求此法,建立不得者,不得妄付《壇經》。告諸同道者,令知密意。

南宗頓教最上大乘壇經一卷

大乘志三十 大聖志四十 大通志五十 大寶志六十 大法志七 十 大德志八十 清之藏志三十 清持藏志四十 清寶藏志五十 清蓮藏志六十 清海藏志七十 大法藏志八十 此是菩薩法號

CBETA 贊助資訊

(https://www.cbeta.org/donation/index.php)

CBETA 成立於 1998 年,於 2023 年 8 月 7 日轉型成為基金會。 成立多年來,一部部佛典在嚴謹控管中轉換為數位典藏,不只數量 龐大,而且文字校訂精確可信,又加新式標點方便閱讀。「CBETA 電子佛典集成」不僅獲得國際學界的重視及肯定,也成為大眾廣為 運用的公共資源,如此成果都是在廣大信眾及有識之士的支持下才 得以實現。

對一個從事佛法志業的非營利團隊,能夠長期埋首理想、踏實耕耘 是非常不容易的。如今,CBETA 運作經費日漸拮据,但「佛典集 成」仍有許多未竟之功。因此,懇請大家慷慨解囊、熱情贊助,讓 未來有更多更好的電子佛典。

您的捐款本會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子化所做的一切貢獻。

信用卡線上捐款

本線上捐款與 netiCRM 及 NewebPay 藍新金流合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

不管您持有的是國內或國外卡,所有捐款最終將以新台幣結算,所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

前往捐款

劃撥捐款

郵政劃撥帳號:50468285

戶名: 財團法人佛教電子佛典基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人佛教電子佛典基金會」。

For donations by check, please write the check to "Comprehensive Buddhist Electronic Text Archive Foundation".